

**SPECIJALNA OLIMPIJADA  
BOSNE I HERCEGOVINE**

**S T A T U T**

Mart 2013. godine

Na osnovu odredaba Zakona o udruženjima i fondacijama BiH ("Službeni glasnik BiH" broj 32/01, 42/03 i 63/08), Skupština Specijalne olimpijade Bosne i Hercegovine, dana 09. 03. 2013. godine je donijela

## **STATUT SPECIJALNE OLIMPIJADE BOSNE I HERCEGOVINE**

### **OPŠTE ODREDBE**

(1) Specijalnu olimpijadu Bosne i Hercegovine (u daljem tekstu: SOBiH) čine pravna lica, odnosno Sportski savez mentalno nedovoljno razvijenih lica Republike Srpske i udruženja/organizacije koja se, u okviru svojih djelatnosti, pretežno bave aktivnostima lica sa intelektualnim poteškoćama sa teritorije Federacije Bosne i Hercegovine.

(2) SO BiH je u ostvarivanju svojih ciljeva i zadataka samostalna organizacija koja poštuje načela decentralizacije.

(3) SOBiH je nevladina, nestranačka, nezavisna sportska organizacija, a po svom karakteru, organizaciji i ciljevima samostalna asocijacija na nivou BiH, sa zadatkom da organizuje i promoviše Specijalnu olimpijadu (Special Olympics), u skladu sa ovim statutom i odlukama Skupštine i Izvršnog odbora.

#### Član 2.

Područje djelatnosti SO BiH je teritorija Bosne i Hercegovine.

#### Član 3.

(1) Naziv asocijacije je:

- Специјална олимпијада Босне и Херцеговине.
- Specijalna olimpijada Bosne i Hercegovine.
- Special Olympics Bosnia and Herzegovina.

(2) Skraćeni naziv je:

- СО БиХ
- SO BiH
- SO BiH.

(3) Sjedište SO BiH je u Sarajevu, u Ulici Teheranski trg do broja 6.

#### Član 4.

(1) SO BiH je pravno lice, sa obavezama i odgovornostima utvrđenim zakonom i ovim Statutom.

(2) SO BiH ima pravni status udruženja građana, i registruje se u nadležnim ministarstvima na nivou BiH.

(3) SO BiH za preuzete obaveze odgovara sopstvenom imovinom (potpuna odgovornost).

(4) SO BiH ima svoj transakcijski račun.

(5) Službeni jezici SO BiH su oni jezici koji su definisani Ustavom BiH, uz ravnopravnu upotrebu latiničnog i ćirilicnog pisma.

## Član 5.

SO BiH ima svoj znak (amblem), pečat i zastavu okruglog oblika, i to:

- pečat SO BiH je okruglog oblika promjera 3,5 cm i unjemu je upisan puni naziv SO BiH na jezicima i pismima konstitutivnih naroda u Bosni i Hercegovini i engleskom jeziku, a centralno mjesto zauzima znak SO BiH,
- znak SO BiH je u skladu sa Akreditivnim standardima Međunarodne specijalne olimpijade (Special Olympics), koji označava djelatnost SO BiH i predstavlja specijalne takmičare okupljene u krug prijateljstva,
- zastava SO BiH je u osnovi bijela, a u sredini je znak logo Special Olympicsa sa nazivom SO BiH.

(2)SO BiH ima štambilj pravougaonog oblika na kome je ispisan naziv i sjedište.

(3)SO BiH je vlasnik i isključivi korisnik zastave i amblema.

(regulisati izgled zastave.shodno pečatu i nazivu organizacije-3 jezika,2 pisma)

**( zastava mora biti jedinstvena za sve članice SOI)**

## Član 6.

Javnost rada SO BiH obezbjeđuje se u skladu sa odredbama ovog Statuta.

## Član 7.

(1)SO BiH je pridruženi član Olimpijskog komiteta Bosne i Hercegovine.

(2)SO BiH sa svojim osnivačima i članovima funkcionišu kao jedinstveni sistem.

(3)Članovi SO BiH u ostvarivanju svojih ciljeva i zadataka samostalno uređuju svoju unutrašnju organizaciju i rad, donose i realizuju programe razvoja na teritoriji entiteta, organizuju i vode takmičenje na entitetskom nivou i ostvaruju ciljeve i zadatke SO BiH na teritoriji entiteta.

(4)Organizacija i rad članova SO BiH uređuje se entitetskim ili kantonalnim zakonima o sportu i njihovim statutima.

## Član 8.

(1)SO BiH je član Međunarodne specijalne olimpijade (Special Olympics), i nastavlja kontinuitet članstva u svim međunarodnim sportskim organizacijam u skladu sa ovim statutom i pravilima Special Olympics (u daljem tekstu: SOI). U skladu sa navedenim SO BiH preuzima obavezu, i to:

- a) poštovanja principa lojalnosti, integriteta i sportskog duha u skladu sa duhom i pravilima ferpleja (fer-play);
- b) izbjegavanja svake vrste diskriminacije u pogledu političke, etičke polne, vjerske, rasne i jezičke i bilo koje druge pripadnosti;
- v) pridržavanje propisa i direktiva SOI, kao i odluka donesenih u okviru te organizacije;
- g) učestvovanje na takmičenjima, koja organizuje SOI, u skladu sa odgovarajućim akreditacijskim standardima;

## Član 9.

(1)Teritorijalna baza članova SOBiH je definisana u skladu Dejtonskim mirovnim sporazumom i Ustavom BiH i entiteta.

(2)Članovi SO BiH imaju svoja prava i obaveze, i to:

1. u okviru SO BiH pokreću i razmatraju sva pitanja iz djelatnosti SO BiH a u cilju unapređenja Specijalne olimpijade;
2. neposredno ili preko svojih predstavnika u SO BiH, daju prijedloge, sugestije i mišljenja radi donošenja odgovarajućih odluka, zaključaka i drugo, i da traže intervenciju SO BiH kod nadležnih sportskih i državnih organa radi zaštite interesa Specijalne Olimpijade;
3. iniciraju, predlažu i odlučuju o osnivanju odgovarajućih oblika organizovanja i rada u SO BiH;
4. koriste stručnu i drugu pomoć, kao i usluge koje vrši SO BiH u okviru svoje djelatnosti;
5. biraju svoje predstavnike u organima i oblicima organizovanja rada u SO BiH;
6. da se pridržavaju principa lojalnosti, intertigrata i sportskog duha u skladu sa duhom ferpleja (fer-play);
7. izbjegavaju svaku vrstu diskriminacije u pogledu političke, etičke, polne, vjerske, rasne jezičke i bilo koje druge pripadnosti;
8. da se obavežu Statutom, propisima i direktivama SOBiH i SOI, kao i odlukama donesenim u skladu sa njima, te da se pridržavaju istih;
9. daju SO BiH informacije i podatke koje on od njih traži radi obavljanja zakonom i statutom predviđenih poslova i zadataka;
10. uredno plaćaju SO BiH članarinu i obezbeđuju uslove za efikasan rad SO BiH;
11. u međusobnim odnosima njeguju i poštuju sportski moral i sportski duh;
12. međusobno sarađuju radi ostvarivanja ciljeva i zadataka predviđenih Statutom, drugim aktima SO BiH i odlukama organa SO BiH;
13. učestvuju u stručnim aktivnostima SO BiH;
14. ostvaruju uvid u rad SO BiH i njegovih organa;
15. učestvuju u utvrđivanju plana i programa rada SO BiH;
16. ispunjavaju obaveze utvrđene Statutom i drugim aktima SO BiH.

#### Član 10.

(1) Djelatnosti SO u BiH su:

- Ojačavanje pozicije ljudi sa intelektualnim poteškoćama kroz podizanje fizičke osposobljenosti, produktivnosti i destigmatizaciju kroz treninge i takmičenja. Specijalna olimpijada nudi djeci i odraslim osobama sa intelektualnim poteškoćama cjelogodišnje treninge i učešća u (29) različitih zimskih i ljetnih sportova. Specijalna olimpijada ne naplaćuje učešće sportistima. Učešće na takmičenjima je dobrovoljno i organizuje se na ne profitabilnoj osnovi, te se učesnicima ne mogu tražiti nikakve materijalne nadoknade. SOBiH se bavi uspostavljanjem, razvojem i promocijom specijalnih sportskih programa lica oba pola sa lakim, umjerenim ili težim intelektualnim poteškoćama, a sve u skladu sa poveljom i Opštim pravilima SOI.

### CILJEVI I ZADACI

#### Član 11.

SO BiH obavlja ciljeve i zadatke koji su od zajedničkog interesa i od koristi za članove, a naročito:

1. Pomoć licima oba pola sa intelektualnim poteškoćama da postanu i participiraju kao produktivni članovi društva u najširem smislu te riječi.

2. Pružanje otvorenih prilika za razvoj i demonstraciju sposobnosti i osobina lica sa intelektualnim poteškoćama kroz sport, a odnosi se na trening, fizičko vježbanje i takmičenje.
3. Podizanje društvene svijesti o sposobnostima i potrebama lica sa intelektualnim poteškoćama.
4. Saradnja sa drugim organizacijama u zemlji i svijetu koje se bave pružanjem psihosocijalne pomoći ugroženim socijalnim kategorijama, posebno sa organizacijama koje se primarno bave licima sa intelektualnim poteškoćama, a naročito sa organizacijama Specijalne Olimpijade u okruženju i svijetu.
5. Pripremanje takmičenja za učestvovanje na Specijalnim olimpijskim igrama u organizaciji SOI, i drugim takmičenjima.
6. Zalaganje za unaprijeđivanje edukacije i razvijanje trajnog usavršavanja u području sportova Specijalne Olimpijade, sportske rekreacije, rehabilitacije i specifične zaštite lica sa intelektualnim poteškoćama.
7. Organizovanje stručnih seminara, savjetovanja i konferencija, simpozijuma i kongresa za svoje članove i sva zainteresovana lica.
8. Uspostavljanje porodičnih programa radi uključivanja lica sa intelektualnim poteškoćama i članova njihovih porodica u sportske aktivnosti.
9. Zastupa zajedničke interese članova SOBIH pred državnim i drugim sportskim organima i organizacijama i učestvuje u pripremi propisa od interesa za članove SO BiH i daje mišljenje na nacрте i prijedloge tih propisa;
10. Organizuje i pruža stručnu pomoć svojim članovima u unapređivanju njihovog rada;
11. Organizuje inovaciju kadrova u Specijalnu olimpijadu posebno rukovodećih i stručnih radnika;
12. Radi na jačanju sportskog morala i sportskog duha kod svojih članova i utvrđuje pravila ponašanja u njihovim međusobnim odnosima;
13. Podstiče rad svojih članova dodjeljivanjem nagrada i priznanja (godišnjih, jubilarnih i dr.) za izuzetne rezultate, doprinos razvoju i unapređivanju Specijalne Olimpijade;
14. Usklađuje aktivnosti članova SO BiH;
15. Ostvaruje međunarodnu saradnju u skladu sa usvojenom međunarodnom politikom SO BiH;
16. Organizuje i obezbjeđuje uslove za susrete i razgovore članova SO BiH i drugih zainteresovanih pravnih i fizičkih lica, radi razmjene iskustva, poslovnog i sportskog povezivanja i ostvarivanja zajedničkih poslova i sportskih interesa;
17. Pruža pomoć svojim članovima u oblasti marketinga, povezivanjem sa privredom, uvođenja novih metoda rada i poslovanja, pribavljanja poslovnih informacija i sl;
18. Utvrđuje i sprovodi takmičenja u sportovima Specijalne olimpijade na nivou BiH;
19. Planira i organizuje međunarodna takmičenja i manifestacije, i organizuje učešće reprezentacije BiH na međunarodnim takmičenjima u inostranstvu u okviru međunarodne politike SO BiH.
20. Da se bavi svim pitanjima koje se odnose na Specijalnu olimpijadu u skladu sa ovim statutom;
21. Da razvija, promoviše, koordinira i unapređuje Specijalnu olimpijadu na svim nivoima na cijeloj teritoriji BiH;
22. Da rukovodi takmičenjima koja su u njenjoj nadležnosti, razvija ih i unapređuje na svim nivoima;
23. Da održava kontakte i da saraduje sa SOI;
24. Da štiti i poštuje prava i interese svojih članova i da rješava sporove među njima;

(2)Kao dio definisanih ciljeva iz stava 1. ovog člana, SO BiH je odgovorna za sljedeće:

- a) da rukovodi svim takmičenjima, koja se održavaju na nivou BiH, i da definiše uslove njihove organizacije;
- b) da donosi takmičarske programe i pravilnike;
- v) da donosi programe i pravilnike školovanja i stručnog usavršavanja kadrova za rad u Specijalnoj Olimpijadi;
- g) da učestvuje u međunarodnim takmičenjima, organizuje i rukovodi svim reprezentativnim selekcijama BiH.

#### Član 12.

SO BiH može radi postizanja ciljeva i zadataka predviđenim ovim Statutom, osnovati preduzeće, ustanovu, agenciju ili drugi zakonom propisan oblik organizovanja, u zemlji i inostranstvu, samostalno ili sa drugim pravnim ili fizičkim licima.

### **TAKMIČENJA SPECIJALNE OLIMIJADE**

#### Član 13.

(1) Izvršni odbor SO BiH donosi posebna pravila i pravilnik o organizaciji takmičenja i izbora reprezentacije BiH u skladu sa akreditacijskim pravilima.

(2) SO BiH je organizator ili pokrovitelj takmičenja Specijalne olimpijade na nivou BiH.

(3) Odluku o učestvovanju i finansiranju reprezentacije BiH i pojedinaca, na zvaničnim međunarodnim sportskim takmičenjima pod organizacijom SOI, te pripremama, donosi Izvršni odbor na prijedlog nadležnog organa.

(4) Članovi SO BiH, ni bilo ko drugi, ne može organizovati zvanična međunarodna takmičenja u sportovima Specijalne olimpijade, koja se organizuju pod SOI, bez saglasnosti SO BiH.

#### Član 14.

SO BiH utvrđuje pravila i uslove za organizaciju takmičenja u sportovima Specijalne Olimpijade na nivou BiH i učešće na njima.

#### Član 15.

Izvršni odbor može opštim aktom ustanoviti potpun ili djelimičan sistem licenciranja (klubova, sportista, trenera, sudija i sl.), kao uslov za učešće na takmičenjima na nivou BiH, koja se organizuju od strane SO BiH ili pod njegovim pokroviteljstvom u skladu sa SOI programom.

#### Član 16.

(1) Organizator takmičenja je dužan da osigura njegovo nesmetano i bezbjedno održavanje i preduzme mjere propisane zakonom o pravilima SO BiH.

(2) Takmičenja se mogu organizovati ukoliko organizator ima obezbjeđene uslove predviđene pravilima SO BiH.

(3) Organizacije i sportisti mogu da učestvuju na takmičenjima u organizaciji SO BiH ili pod njegovim pokroviteljstvom ako ispunjavaju uslove utvrđene entitetskim zakonima o sportu, Zakonom o sportu u BiH, i pravilima SO BiH.

## UPRAVLJANJE I RUKOVOĐENJE

### Član 17.

SO BiH upravljaju njegovi članovi preko svojih predstavnika u organima SO BiH.

### Član 18.

Organi SO BiH su:

1. Skupština (zakonodavni organ),
2. Izvršni odbor (izvršni organ),
3. Predsjednik (predstavnički organ),
4. Izvršni direktor (stručni i administrativni organ )
5. Disciplinska komisija (pravosudni organ).

### Skupština

### Član 19.

(1) Skupština je najviši organ SO BiH.

(2) Članove (delegata) Skupštine biraju članovi SO BiH.

(3) Skupštinu sačinjavaju 33 delegata, i to:

1. Udruženja/organizacije sa teritorije Federacije BiH (u daljem tekstu: Udruženja iz FBiH) imenuju 22 delegata.
2. Sportski savez mentalno nedovoljno razvijenih lica Republike Srpske (u daljem tekstu: Menerali RS) imenuje 11 delegata.

### Član 20.

Delegati Skupštine biraju se na vrijeme od četiri godine, i mogu biti ponovo birani.

### Član 21.

(1) Mandat delegata Skupštine prestaje prije isteka vremena na koje je izabran:

1. ako podnese ostavku;
2. ako bude opozvan zbog nepridržavanja odredaba Statuta i drugih opštih akata SO BiH ili zbog neopravdanog uzastopnog neprisuusustva na dvije sjednice SO BiH;
3. ukoliko ga opozove član SO BiH ispred kojeg je delegiran u Skupštinu.

(2) Ukoliko delegat Skupštine podnese ostavku ili bude opozvan prije isteka mandata, nadležni članovi SO BiH će, u skladu sa odredbama ovog statuta izabrati drugog delegata na period do isteka mandata delegata koji je podnio ostavku, odnosno koji je opozvan.

### Član 22.

Delegati Skupštine prilikom donošenja odluke dužni su da uvažavaju interese SO BiH u cjelini.

#### Član 23.

- (1) Skupština može biti redovna, vanredna ili izborna.
- (2) Skupština se saziva po potrebi, a najmanje jednom godišnje.
- (3) Svake četvrte godine se saziva Izborna skupština.
- (4) Vanredna Skupština se obavezano saziva na zahtev Izvršnog odbora, Predsjednika ili najmanje 50% članova Skupštine, odnosno najmanje 6 delegata iz Menerali RS i 11 delegata iz Udruženja iz FBiH.
- (5) Na vanrednoj Skupštini se može raspravljati samo o onoj materiji zbog koje je i sazvana.

#### Član 24.

- (1) Skupština (redovna ili vanredna) može pravnovaljano donositi odluke ako je prisutno više od  $\frac{3}{4}$  svih delegata, odnosno 25 delegata od toga 8 delegata iz Menarali RS i 17 delegata iz Udruženja FBiH.
- (2) u slučaju da nije postignut kvorum, Skupština zasjeda po istom dnevnom redu narednog dana na istom mjestu i u isto vrijeme. Drugom zasjedanju, takođe, mora prisustvovati više od  $\frac{3}{4}$  delegata da bi se donosile pravnovaljane odluke.
- (3) Ako se ponovo ne postigne kvorum iz predhodnog stava ovog člana, Izvršni odbor saziva novu Skupštinu po istom dnevnom redu u roku od 15 radnih dana. Izvršni direktor šalje pozive delegatima. Na novosazvanoj Skupštini mora prisustvovati više od polovice svih delegata, odnosno 50%+1 u skladu sa članom 27. stav 1. ovog Statuta, da bi se donosile pravnovaljane odluke.
- (4) Ukoliko se još jednom ne postigne kvorum, Izvršni odbor će od članova SO BiH zahtijevati da odmah razriješe delegate, koji nisu prisustvovali posljednoj sazvanoj Skupštini bez utemeljenog razloga. Takvi delegati se moraju zamijeniti bez odlaganja.
- (5) Dnevni red drugog i trećeg sastanka prisutni delegati ne mogu mijenjati.
- (6) Materijali za Skupštinu (redovnu, vanrednu ili izbornu), moraju biti dostavljeni delegatima najmanje 10 (deset) dana od dana zasjedanja Skupštine.
- (7) Prijelozi za imenovanje delegata iz reda članova SO BiH za izbornu skuštinu moraju se dostaviti Sportskom direktoru najmanje 5 (pet) dana od dana Izborne skuštine

#### Član 25.

- (1) Skupština:
  - a) donosi i usvaja:
    1. Statut SO BiH;
    2. Program rada SO BiH;
    3. Finansijski plan SO BiH;
    4. Kodekse i druga pravila ponašanja;
    5. Godišnji izveštaj o radu SO BiH i njegovih organa;
    6. Odluku o raspolaganju nepokretnostima SO BiH;
    7. Odluku o prestanku rada SO BiH;
    8. Odluku o pravnim lijekovima protiv odluka drugih organa SO BiH;
    9. Sistem takmičenja na nivou BiH;
    10. Odluke koje su joj stavljene u nadležnost ovim Statutom.
  - b) utvrđuje stavove i daje smjernice za rad organima i tjelima SO BiH,
  - v) imenuje i razrješava predsjednika i potpredsjednika SO BiH i članove Izvršnog odbora;



- g) imenuje dva delegata (po jednog iz Menerali RS i Udruženja iz FBiH) kao ovjerivače zapisnika,
  - d) razmatra i usvaja Završni račun SO BiH,
  - e) razmatra i usvaja Izvještaj nezavisnog revizora,
  - ž) usvaja i vrši izmjene i dopune Poslovnika o radu Skupštine i Disciplinskog pravilnika, i
  - z) usvaja i vrši izmjene i dopune strukture na nivou BiH.
- (2) Skupština može razriješiti imenovana lica dužnosti i prije isteka mandata, kada utvrdi da ne izvršavaju svoja prava i obaveze.
- (3) Za vršenje određenih poslova Skupština može formirati komisije. Odlukom o formiranju komisije utvrđuje se i njen djelokrug i sastav.

#### Član 26.

- (1) Radom Skupštine rukovodi predsjednik SO BiH. U slučaju odsutnosti predsjednika, Skupštinom predsjedava potpredsjednik ili u slučaju njegove odsutnosti, Skupštinom predsjedava najstariji član IO.
- (2) Predsjednik i potpredsjednik imaju pravo glasa pri odlučivanju u Skupštini samo ako su i ujedno delegati Skupštine.

#### Član 27.

- (1) Sve odluke, zaključci, rješenja, imenovanja, pitanja i dr., Skupština donosi koncesusom, odnosno da bi svi izglasani dokumenti imali pravnovaljanu snagu, neophodno je da glasa najmanje po 6 delegata Skupštine delegiranih ispred Menerali RS i 11 delegata Skupštine ispred Udruženja iz FBiH.
- (2) Skupština donosi odluku o usvajanju novog Statuta, izmjenama i dopunama Statuta ili prestanka rada SO BiH, većinom od ukupnog broja članova i to za donošenje takvih odluka mora glasati najmanje 8 delegata ispred Menerali RS i 17 delegata ispred Udruženja iz FBiH.

#### Član 28.

- (1) Izvršni direktor vodi zapisnik na sjednicama Skupštine.
- (2) Zapisnik verifikuju u roku od 30 dana od sjednice Skupštine, dva prisutna delegata, koja su imenovana za taj zadatak od strane Skupštine.
- (3) Verifikovani zapisnik će se smatrati usvojenim ako u roku od 30 dana, od njegovog posljednjeg dana roka za slanje, delegati Skupštine ne pošalju Izvršnom direktoru preporučenom poštom primjedbe na isti.
- (4) U slučaju da budu dostavljene primjedbe, zapisnik će biti stavljen za konačno usvajanje na dnevni red naredne sjednice Skupštine.

### **Izvršni odbor**

#### Član 29.

- (1) Izvršni odbor je organ upravljanja SO BiH, odnosno izvršni organ.
- (2) Izvršni odbor se sastoji od 7 članova, i to:
- a) predsjednik;
  - b) potpredsjednik,
  - v) četiri redovna člana.
- (3) Izvršni odbor mora biti zastupljen na sljedeći način:

- a) 4 člana ispred Udruženja iz FBiH, i
- b) 3 člana ispred Menerali RS.

(4) Predsjednik i potpredsjednik ne mogu biti izabrani iz jednog entiteta.

(5) Predsjednik i potpredsjednik Izvršnog odbora su ujedno i predsjednik i potpredsjednik Skupštine.

#### Član 30.

(1) Članove Izvršnog odbora bira Skupština iz reda istaknutih radnika, uz prethodno pribavljene prijedloge Menarali RS i Udruženja iz FBiH, u skladu sa članom 24. stav 7. ovog Statuta, tako da struktura članova Izvršnog odbora odgovara strukturi članstva SO BiH.

(2) Izbor za člana Izvršnog odbora nije vezan za članstvo u Skupštini.

#### Član 31.

Članovi Izvršnog odbora biraju se na vrijeme od četiri godine, i mogu biti ponovo birani.

#### Član 32.

Mandat člana Izvršnog odbora prestaje prije isteka vremena na koje je izabran:

1. ako podnese ostavku;
2. ako ga opozove Skupština zbog ne pridržavanja Statuta i drugih opštih akata SO BiH;
3. odnosno zbog neurednog prisustvovanja sjednicama Izvršnog odbora;
4. ukoliko ga opozove član SO BiH ispred kojeg je delegiran u Izvršni odbor.

#### Član 33.

(1) U pravilu, Izvršni odbor radi na sjednicama koje se održavaju po potrebi, a najmanje jednom u tri mjeseca. Sjednicu saziva i njom predsjedava predsjednik. Na pismeni zahtjev 1/3 članova, predsjednik je dužan sazvati sjednicu Izvršnog odbora, koja se mora održati u roku od narednih 15 radnih dana.

(2) Članovi Izvršnog odbora mogu dostaviti Izvršnom direktoru teme za dnevni red, uključujući i kratko obrazloženje, najmanje 8 (osam) radnih dana prije održavanja sjednice.

(3) Izvršni direktor, konačni dnevni red koji je odobrio predsjednik, dostavlja članovima Izvršnog odbora najmanje 5 (pet) radnih dana prije datuma zakazivanja sjednice.

(4) Sjednica Izvršnog odbora nije otvorena za javnost. Izvršni odbor može pozvati treća lica da prisustvuju sjednici Izvršnog odbora. Navedena treća lica nemaju pravo glasa, ali im je dozvoljeno da izraze svoje mišljenje uz dozvolu Izvršnog odbora.

(5) Izvršni direktor prisustvuje sjednicama Izvršnog odbora u savjetodavnom svojstvu, bez prava glasa.

#### Član 34.

(1) Sjednici Izvršnog odbora mora prisustvovati najmanje četiri člana, od toga najmanje 2 ispred Menerali RS i najmanje 2 ispred Udruženja iz FBiH, da bi se donosile pravnovaljane odluke.

(2) U slučaju da Izvršni odbor nema kvorum, naredna sjednica se mora održati u roku od najviše 15 (petnaest) radnih dana, sa istim dnevnim redom. Izvršni direktor pismeno i usmeno upućuje poziv svim članovima sa datumom, mjestom i vremenom održavanja.

(3) Na ponovljenoj sjednici da bi Izvršni odbor donosio pravnovaljane odluke mora prisustvovati isti minimalni broj članova propisan stavom 1. ovog člana.

(4) Ako se ne postigne ni drugi kvorum, u konkretnom slučaju kada redovni član Izvršnog odbora nije prisustvovao sjednici bez opravdanog razloga predsjednik SO BiH upućuje prijedlog za razrješenje tog redovnog člana Izvršnog odbora. Upraznjeno mjesto se popunjava u skladu sa imenovanjem člana Izvršnog odbora.

(5) U određenim ili specifičnim uslovima sjednica Izvršnog obora se može zakazati u putem video veze, u skladu sa ovim članom, osim u slučaju kada se donosi ili usvaja opšti akt SO u BiH.

#### Član 35.

(1) Izvršni odbor donosi pravnovaljane odluke ako za njih glasa više od 5 članova, i to najmanje 2 člana ispred Menerali RS i najmanje 3 člana ispred Udruženja iz FBiH.

(2) Izvršni odbor može donositi odluke samo o onim pitanjima koja su pravnovaljano stavljena na dnevni red.

(3) Pravnovaljane odluke Izvršnog odbora stupaju na snagu danom donošenja ili objavom u Službenom glasniku SO BiH, osim ako Izvršni odbor odluči drugačije.

#### Član 36.

Izvršni odbor ima sljedeće nadležnosti:

1. utvrđuje prijedlog Statuta SO BiH i prijedloge opštih akata koje donosi Skupština,
2. utvrđuje prijedlog programa rada i prijedlog finansijskog plana;
3. odlučuje o osnivanju preduzeća, ustanova, agencija i dr. od značaja za i njegove članove;
4. donosi opšta akta SO BiH čije donošenje nije u nadležnosti Skupštine;
5. donosi Pravilnik o organizaciji SO BiH, Pravilnik o disciplinskoj i materijalnoj odgovornosti, Takmičarski pravilnik, Pravilnik o stručnom usavršavanju i osposobljavanju, Pravilnik o nagradama i priznanjima, druge pravilnike propisane ovim statutom, i akt o formiranju Službenog glasnika SO BiH i dr.;
6. usvaja završni račun SO BiH;
7. utvrđuje program međunarodne saradnje i međunarodnih takmičenja, koji su u nadležnosti SO BiH;
8. nadgleda sprovođenje takmičenja na nivou BiH;
9. odlučuje o mjestu održavanja međunarodnih sportskih takmičenja u organizaciji SO u BiH i neposrednom organizatoru takmičenja;
10. imenuje rukovodstvo reprezentacija BiH za pojedina međunarodna takmičenja i razmatra izveštaje rukovodstva sa tih takmičenja;
11. utvrđuje kalendar i propozicije takmičenja na nivou BiH, i odlučuje o mjestu njihovog održavanja;

12. imenuje nezavisnog revizora;
13. nadzire zakonitost rada sportskog direktora u skladu sa zadanim zakonskim okvirom i odlukama SO BiH;
14. usvaja Opis poslova i zadataka, i organizaciona pravila unutar organizacije SO BiH, na prijedlog sportskog direktora.
15. priprema redovne i vanredne sjednice Skupštine;
16. odlučuje kao drugostepeni organ o žalbama protiv prvostepenih odluka organa i imenovanih lica SO BiH, koje nisu upućena Stalnom arbitražom;
17. verifikuje rezultate sa takmičenja;
18. bira i opoziva predstavnike u organima i tijelima organizacija ili saveza u kojima je SO BiH član;
19. dodeljuje nagrade i priznanja SO BiH;
20. vrši druge poslove iz djelatnosti SO BiH koji nisu u djelokrugu Skupštine, ili su mu dodijeljeni ovim Statutom.

#### Član 37.

Za vršenje određenih poslova iz svoje nadležnosti Izvršni odbor može obrazovati komisije i radna tijela. Odlukom o obrazovanju komisije, odnosno radnog tijela utvrđuje se njen djelokrug i sastav.

### **Predsjednik**

#### Član 38.

(1) SO BiH ima predsjednika SO BiH kojeg bira i razrješava Skupština na period od 4 (četiri) godine s mogućnošću ponovnog izbora.

(2) Predsjednik SO BiH:

1. zastupa i predstavlja SO BiH u pravnom prometu;
2. saziva sjednice Izvršnog odbora i predsjedava im;
3. potpisuje opšta i druga akta koje donosi Izvršni odbor;
4. prati provođenje programa rada SO BiH, kao i odluka i zaključaka Izvršnog odbora;

(3) Predsjednik SO BiH je ujedno i predsjednik Skupštine i Izvršnog odbora.

(4) Predsjednik, zajedno sa Izvršnim direktorom, ima ovlašćenja za potpisivanje, izuzev ako specifičnim potpisima, koje je usvojio Izvršni odbor, nije drugačije regulisano.

#### Član 39.

(1) U slučaju spriječenosti predsjednika SO BiH da obavlja svoje poslove, zamijeniće ga potpredsjednik SO BiH koji u obavljanju poslova preuzima njegova ovlašćenja i dužnosti, a kojeg bira Skupština na mandat od 4 godine. Potpredsjednik SO u BiH je ujedno i potpredsjednik Skupštine i Izvršnog odbora.

(2) Predsjednik SO BiH za svoj rad odgovoran je Skupštini.

(3) Svaki drugi (naredni) mandatni period (4 godine) na funkciju predsjednika SO BiH imenuje se lice kojeg delegiraju predstavnici drugog entiteta u odnosu na prvi mandatni period.

### **Izvršni direktor**

#### Član 40.

(1) SO BiH ima izvršnog direktora (u daljem tekstu: Direktor) kojeg imenuje i razrješava Izvršni odbor na period od 4 godine s mogućnošću ponovnog izbora.

(2) Direktor može svoje poslove obavljati i profesionalno do punog radnog vremena ako postoji finansijska mogućnost i opravdanost.

#### Član 41.

(1) Direktor obavlja:

- zastupa i predstavlja SO BiH u pravnom prometu,
- stara se i preduzima mjere za realizaciju plana i programa SO BiH kao i provođenje odluka Skupštine, Izvršnog odbora i njihovih radnih tijela,
- priprema sjednice Skupštine i Izvršnog odbora, kao i njihovih radnih tijela;
- stara se o zakonitosti rada i ispunjavanju zakonom, ugovorom ili na drugi način preuzetih obaveza SO BiH;
- sačinjava prijedlog i daje na usvajanje Izvršnom odboru Strateški plan SO BiH, kao i razvojni plan SO BiH, te sudjeluje u provodjenju istih;
- zastupa interese SO BiH;
- prisustvuje sjednicama Skupštine i Izvršnog odbora te vodi zapisnik sjednica Skupštine i Izvršnog odbora, i drugih važnih sjednica;
- predlaže rješenja za unapređivanje djelatnosti i poslova SO BiH;
- brine o urednom obavljanju korespondencije sa trećim osobama, koordiniše administrativno-tehničke poslove;
- za svoj rad odgovara predsjedniku SO BiH i Izvršnom odboru SO BiH;
- podnosi godišnje izvještaje Izvršnom oboru; i
- obavlja i druge poslove utvrđene ovim Statutom, drugim aktima ili odlukom predsjednika SO BiH, Izvršnog odbora ili Disciplinske komisije.

(2) Za direktora može biti imenovano lice koje ispunjava sljedeće uslove:

- da je državljanin BiH.
- da posjeduje visoku stručnu spremu.
- da se nije ogriješio o etičke norme i moralna načela sporta i olimpizma.
- prednost pri izboru ima lice koja je uključeno u aktivnosti i organiziranja takmičenja za lica sa intelektualnim poteškoćama.

#### Član 42.

Direktor može biti opozvan i prije isteka vremena na koje je izabran i to:

- na sopstveni zahtjev,
- ako svojim radnjama ruši ugled SO BiH,
- ako ne postupa u skladu sa upustvima Izvršnog odbora,
- kao i u drugim slučajevima predviđenim Zakonom, ovim Statutom i aktima SO BiH.

### **OBLICI STRUČNOG ORGANIZOVANJA I RADA**

#### Član 43.

Oblici organizovanja i rada u SO BiH, preko kojih se odvija djelatnost, su komisije, odbori ili divizije.

## **Komisije**

### **Član 44.**

U SO BiH postoje sljedeće komisija:

1. selektorska komisija,
2. disciplinka komisija.

### **Član 45.**

(1) Sastav, broj članova, način izbora i djelokrug rada komisija utvrđuju se pravilnikom koji usvaja Izvršni odbor.

(2) Selektorsku komisiju čine koordinatori divizija.

(3) Selektorska komisija, na prijedlog nadležnih odbora, utvrđuje plan i program priprema i rada za četverogodišnje i godišnje planove i programe rada, koje predlaže Izvršnom odboru na usvajanje.

(4) Na prijedlog Izvršnog odbora, Skupština može formirati i druge komisije.

### **Član 46.**

(1) Disciplinska komisija sastoji se od tri (3) člana, predsjednika i dva (2) člana, koje imenuje Izvršni odbor, od toga najmanje 1 član mora biti imenovan o strane Menerali RS i Udruženja FBiH.

(2) Pravnovaljane odluke donose se prostom većinom članova ako je za njih glasao po jedan član imenovan ispred Menerali RS i Udruženja FBiH.

(3) Disciplinska komisija rješava sporove između članova SOBiH i njezinih međusobnih odnosa, sporove između članova SO BiH i angažovanog sportiste, odnosno trenera i funkcionera SO BiH, kao i sporove između SO BiH i njegovih članova u vezi sprovođenja Statuta i opštih akata SO BiH i međusobnih imovinskih odnosa.

(4) Nezadovoljna strana u procesu donošenja odluka Disciplinske komisije ima pravo podnijeti žalbu Izvršnom odboru i to u roku od 15 dana od dana prijema odluke Disciplinske komisije.

(5) Odluke Izvršnog odbora po pitanjima odluka Disciplinske komisije su konačne.

(6) U slučaju blokade rada organa člana SO BiH zbog sukoba unutar člana SO BiH, spor rješava Disciplinska komisija.

(7) Izvršni odbor odbor iz djelokruga svoje nadležnosti može Disciplinskoj komisiji prepustiti predmete na rješavanje.

## **Divizije i odbori**

### **Član 47.**

U SO BiH u postoje sljedeće divizije i odbori:

1. Divizija I
2. Divizija II
3. Divizija III
4. Odbor za sudije.
5. Odbor za trenere

#### Član 48.

(1) Sastav, broj članova, način izbora i djelokrug rada divizije ili odbora utvrđuju se pravilnikom koji usvaja Izvršni odbor.

(2) Vođenje poslova reprezentacija i prijedloga za izbor članova reprezentacije u nadležnostima je divizija.

(3) Na prijedlog Izvršnog odbora, Skupština može formirati i druge odbore i divizije ili rasformirati postojeće odbore iz člana 47. ovog Statuta.

### REPREZENTACIJA

#### Član 49.

O takmičenjima za reprezentaciju BiH, iz predhodnog člana, vodi se posebna evidencija.

#### Član 50.

(1) Članove reprezentacija BiH određuje Selektorska komisija na prijedlog resorno nadležnih divizija.

(2) Na prijedlog nadležnih divizija, Selektorska komisija, za reprezentacije BiH bira trenere navedenih reprezentacija, a na prijedlog odbora za trenere.

#### Član 51.

Kriterijume na osnovu kojih se definišu prava i obaveze reprezentativaca i trenera BiH utvrđuje se posebnim pravilnikom kojeg donosi Izvršni odbor.

#### Član 52.

Oznake i simbole reprezentacije, sportisti mogu nositi samo na takmičenjima na kojima se takmiče za reprezentaciju BiH.

### SARADNJA

#### Član 53.

SO BiH izražava zajedničke interese svojih članova u odnosima sa organizacijama lica sa poteškoćama u razvoju stranih zemalja, kao i sa odgovarajućim međunarodnim sportskim organizacijama, i u tom cilju sarađuje sa njima.

#### Član 54.

SO BiH ostvaruje svoje članstvo u svim međunarodnim asocijacijama koja se bave sportskim aktivnostima i djelatnostima lica sa poteškoćama u razvoju.

#### Član 55.

U ostvarivanju svojih ciljeva, SO BiH saraduje sa: drugim savezima ili asocijacijama na nivou BiH u oblasti sporta; organizacijama za obavljanje sportske djelatnosti; državnim i entitetskim organima; drugim zainteresovanim institucijama, organizacijama, pojedincima i stručnim udruženjima.

## **SREDSTAVA ZA RAD I FINANSIRANJE RADA**

### **Član 56.**

(1) Sredstava za rad SO BiH obrazuju se od: doprinosa (članarine) njegovih članova, naknada za usluge i naknada za obavljanje djelatnosti, prihoda sopstvenih preduzeća i drugih privrednih organizacija, priloga donatora i sponzora, donacija iz budžeta i drugih izvora.

(2) SO BiH može sticati prihode i od obavljanja pojedinih djelatnosti (informisanje i izdavaštvo, ugostiteljstvo, turizam, organizovanje priredbi i manifestacija, obučavanje, i sl.) kada je to zakonom koji tu djelatnost reguliše dopušteno.

(3) Djelatnosti iz stava 2. ovog člana se registruju u nadležnom sudu kada je to propisano zakonom koji tu djelatnost reguliše.

### **Član 57.**

Visinu, način i rokove plaćanja doprinosa (članarine) utvrđuje Izvršni odbor.

### **Član 58.**

(1) Za finansiranje posebnih aktivnosti iz programa rada SO BiH, zainteresovani članovi mogu da udružuju sredstva i osnivaju fondove sa posebnom namjenom u SO BiH.

(2) Raspolaganje i rukovođenje sredstvima iz stava 1. ovog člana vrši se saglasno odluci udružioca sredstava i odgovarajućim opštim aktima SO BiH.

### **Član 59.**

Materijalno-finansijsko poslovanje i evidencija sredstava SO BiH utvrđuje se posebnim opštim aktom SO BiH.

### **Član 60.**

(1) SO BiH upravlja i koristi objekte i sredstva kojima raspolaže ili su mu dati na korišćenje.

(2) SO BiH može objekte i sredstva kojima raspolaže, odnosno koristi dati na korišćenje članovima SO BiH, pod uslovima utvrđenim odlukom Izvršnog odbora.

### **Član 61.**

Imovina i sredstva koju SO BiH ima na dan usvajanja ovog statuta, odnosno donošenjem odluke o transformaciji SO BiH, predstavlja društveni kapital kojim SO BiH raspolaže u skladu sa zakonom.

## **JAVNOST RADA**



#### Član 62.

(1) Javnost rada SO BiH obezbjeđuje se javnošću sjednica organa i tijela i drugih skupova u SO BiH, izdavanjem informacija o njihovom radu, saradnjom sa sredstvima javnog informisanja i drugim sredstvima obavještanja.

(2) SO BiH može imati svoje glasilo, čiji sadržaj i naziv utvrđuje Izvršni odbor.

#### Član 63.

Organi i tijela SO BiH mogu isključiti, ili ograničiti javnost sjednice ili skupa, kada se razmatraju dokumenta i podaci povjerljive prirode.

#### Član 64.

SO BiH redovno upoznaje svoje članove i javnost sa odlukama, stavovima i prijedlozima usvojenim na sjednicama organa i tijela i drugih skupova u SO BiH, i aktuelnim dešavanjima u članovima SO BiH, putem sredstava Službenog glasnika SO u BiH, javnog informisanja, ili izdavanjem posebnih informacija i biltena.

#### Član 65.

(1) Predstavnik SO BiH koji daje podatke i informacije u vezi sa radom SO BiH odgovoran je za njihovu tačnost.

(2) Stavove SO BiH, odnosno njegovih organa i tijela mogu da iznose i zastupaju samo izabrani funkcioneri SO BiH, definisani ovim Statutom.

### OPŠTI AKTI

#### Član 66.

(1) Opšti akti SO BiH su Statut, pravilnici, poslovnici i odluke kojima se na opšti način uređuju određena pitanja.

(2) Svi opšti akti moraju biti objavljeni u Službenom glasniku SO BiH.

#### Član 67.

(1) Inicijativu za izmjene i dopune opšteg akta, odnosno Statuta i može dati Izvršni odbor, članovi SO BiH i delegati Skupštine, u skladu sa odredbama ovog Statuta.

(2) O inicijativi za izmjene i dopune Statuta razmatra Izvršni odbor u roku od 30 dana od dana podnošenja inicijative. Ukoliko prihvati inicijativu, Izvršni odbor utvrđuje Nacrt statuta, odnosno Nacrt izmjena i dopuna Statuta i organizuje javnu raspravu među članovima SO BiH. Javna rasprava traje 30 radnih dana od dana dostavljanja materijala na raspravu.

(3) U roku od 30 radnih dana od okončanja javne rasprave, Izvršni odbor utvrđuje prijedlog izmjena i dopuna Statuta i dostavlja ga Skupštini na usvajanje.

(4) U hitnim slučajevima Izvršni odbor može uputiti Skupštini prijedlog za izmjene i dopune Statuta i bez sprovođenja javne rasprave, ako se odluka o hitnom usvajanju izmjena i dopuna Statuta donese jednoglasno od strane članova Izvršnog odbora.

(5) O neprihvatanju inicijative za donošenje izmjena i dopuna Statuta, Izvršni odbor obavještava podnosioca inicijative. Podnosilac inicijative nezadovoljan odlukom Izvršnog odbora može predložiti Skupštini da pokrene postupak izmjene i dopuna Statuta.

#### Član 68.

Inicijativu za donošenje opštih akata iz nadležnosti Izvršnog odbora, mogu dati predsjednik SO u BiH, članovi SO BiH i članovi Izvršnog odbora.

#### Član 69.

(1) Opšti akti stupaju na snagu osmog dana od dana objavljivanja u Službenom glasniku SO BiH, osim ako je odlukom o njihovom donošenju određen drugi rok njihovog stupanja na snagu.

(2) Odlukom o donošenju opšteg akta SO BiH određuje se način njegovog objavljivanja.

(3) Odluke nižih oblika organizovanja SO BiH (odbori, komisije, divizije i sl.) mogu donositi odluke i putem e-maila, skypea, koje moraju biti objavljene u Službenom glasniku SO BiH, u suprotnom nisu pravnovaljane.

### **EVIDENCIJE PLANOVI**

#### Član 70.

SO BiH i članovi SO BiH vode evidenciju svojih članova, sportskih objekata, sportista, sportskih stručnjaka i sportskih rezultata u skladu sa akreditacijskim pravilima SOI.

#### Član 71.

SO BiH je dužan da se upiše u matične evidencije koje vodi ministarstvo, i da se u slučaju prestanka rada iz nje odjavi.

#### Član 72.

(1) U SO BiH se izrađuju jednogodišnji i četvorogodišnji planovi rada i razvoja, i planovi stručnog rada u skladu sa planovima i programima SOI.

(2) Način izrade planova određuje Izvršni odbor.

### **PRESTANAK RADA**

#### Član 73.

(1) SO BiH prestaje sa radom u skladu sa zakonom.

(2) Odluku o prestanku rada SO BiH donosi Skupština, kada se svi delegati Skupštine pismenim putem izjasne za prestanak rada SO BiH.

#### Član 74.

U slučaju prestanka rada, imovina SO BiH će se podijeliti u skladu sa Zakonom.

### **PRELAZNE I ZAVRŠNE ODREDBE**

Član 75.

- (1) Opšti akti SO BiH moraju biti usaglašeni sa odredbama ovog Statuta.  
(2) Opšti akti koji nisu usaglašeni sa ovim Statutom nemaju pravnovaljanu snagu.

Član 76.

Izbori za organe SO BiH održavaju se na istoj sjednici na kojoj se usvaja ovaj Statut.

Član 77.

Izmjene i dopune Statuta vrše se na način i u postupku predviđenom za njegovo donošenje.

Član 78.

Ovaj Statut stupa na snagu danom donošenja kada prestaje da važi Statut SO u BiH.

U \_\_\_\_\_, \_\_. \_\_. 2013. godine

Za Specijalnu olimpijadu  
Bosne i Hercegovine

---

P r e d s j e d n i k